

Univerzitet u Sarajevu – Pravni fakultet

Broj:

01-970/26

Datum;

23.6. 2026. god.

Komisija za pripremanje prijedloga za izbor u akademsko zvanje viši/a asistent/ica na naučnoj oblasti Porodično pravo

Sarajevo, 15. juna 2026. godine

Vijeću Univerziteta u Sarajevu – Pravnog fakulteta

**IZVJEŠTAJ S PRIJEDLOGOM ZA IZBOR U AKADEMSKO ZVANJE VIŠI/A
ASISTENT/ICA NA NAUČNOJ OBLASTI PORODIČNO PRAVO**

- a) Podaci o objavljenom konkursu, imenovanju i radu Komisije za pripremanje prijedloga za izbor u akademsko zvanje viši/a asistent/ica na naučnoj oblasti Porodično pravo

Na osnovu člana 121 Zakona o visokom obrazovanju Kantona Sarajevo ("Sl. novine Kantona Sarajevo", br. 36/2022 i 28/2025), člana 233 i 234 Statuta Univerziteta u Sarajevu, broj: 01-14-35-1/23 od 26. jula 2023. godine (u daljem tekstu: Statut UNSA), Odluke o usvajanju dinamičkog plana potreba Univerziteta u Sarajevu – Pravnog fakulteta za raspisivanjem konkursa za izbor u zvanje u akademskoj 2025/26. godini, broj: 01-972/25 od 3. septembra 2025. godine, te Odluke Senata Univerziteta u Sarajevu, broj: 01-11-24/26 od 29. aprila 2026. godine, Univerzitet u Sarajevu – Pravni fakultet raspisao je Konkurs za izbor u akademsko zvanje saradnik/ca u zvanje viši/a asistent/ica na naučnoj oblasti Porodično pravo (u daljem tekstu: Konkurs).

Konkurs je objavljen 11. maja 2026. godine u dnevnom listu „Dnevni avaz“, kao i na službenoj internet stranici Univerziteta u Sarajevu – Pravnog fakulteta i Univerziteta u Sarajevu.

Nakon isteka roka za prijave na Konkurs, na osnovu člana 123 Zakona o visokom obrazovanju Kantona Sarajevo (u daljem tekstu: ZOVO KS), te člana 236 Statuta UNSA, Vijeće Univerziteta u Sarajevu – Pravnog fakulteta je, na 111. redovnoj (elektronskoj) sjednici, održanoj 3. juna 2026. godine, donijelo Odluku o imenovanju Komisije za pripremanje prijedloga za izbor u akademsko zvanje viši/a asistent/ica na naučnoj oblasti Porodično pravo (u daljem tekstu: Komisija), 01-822-1/26, u sastavu:

- 1) Dr. Džamna Vranić, redovna profesorica Univerziteta u Sarajevu – Pravnog fakulteta na predmetima naučne oblasti Porodično pravo, predsjednica i članica,
- 2) Dr. Suzana Bubić, profesorica emerita Univerziteta „Džemal Bijedića“ u Mostaru na predmetima naučne oblasti Porodično pravo, članica,
- 3) Dr. Darko Radić, redovni profesor Univerziteta u Banjoj Luci – Pravnog fakulteta na predmetima naučne oblasti Građansko i građansko procesno pravo, član.

Odlukom o imenovanju Komisije, u skladu s članom 236 stav 4 Statuta UNSA, utvrđena je i adekvatnost naučne oblasti na koju je izabran Dr. Darko Radić, s obzirom na to da je u akademsko zvanje redovnog profesora izabran na Univerzitetu u Banjoj Luci – Pravnom fakultetu.

Uz Odluku o imenovanju, Komisija je zaprimila i Potvrdu o prijavama na konkurs za izbor jednog saradnika/ce u zvanje viši/a asistent/ica na naučnoj oblasti Porodično pravo, broj: 01-844/26 od te potvrdu o potpunosti (urednosti) prijave na konkurs br. 01-912/26. kojom se konstatira, u skladu s članom 255 Statuta UNSA, da se na Konkurs blagovremeno prijavio 1 (jedan) kandidat.

U skladu s članom 124 stav 1 ZOVO KS, te članom 236 stav 6 i 256 stav 3 Statuta UNSA, Komisija je obavezna Vijeću Fakulteta podnijeti pisani izvještaj s prijedlogom u roku od 30 (trideset) dana od dana imenovanja.

U skladu s članom 256 stav 1 i 2 Statuta UNSA, Komisija je 10. juna održala konstituirajuću sjednicu na kojoj je usvojila Poslovnik o radu, br. 01-962/26, te uz prisustvo predstavnika stručne službe, otvorila pristiglu prijavu.

U tekstu Konkursa navedeno je da kandidati trebaju ispunjavati uvjete iz člana 112 stav 2 tačka b) ZOVO KS, članova 224-228 Statuta UNSA, i to za zvanje viši/a asistent/ica završen drugi ciklus studija ili njegov ekvivalent s najmanje 300 ECTS, 8 ili 3,5 ili VII stepen studija po predbolonjskom sistemu studija s najnižom prosječnom ocjenom 8 (osam). Uz to, navedeno je da kandidati, uz vlastoručno potpisanu prijavu, na Konkurs prilažu i dokaze u skladu s članom 235 Statuta UNSA: a) biografiju (CV) u štampanoj i elektronskoj formi, b) diplome o završenom I i II ciklusu studija s dodatkom diplomi (original ili ovjerena kopija), c) dokaz o provedenom izbornom periodu u zvanju asistenta (za kandidate koji se prijavljuju u skladu sa uslovima iz Zakona o visokom obrazovanju ("Službene novine Kantona Sarajevo" broj 33/17, 35/20, 40/20, 39/21) (original ili ovjerena fotokopija), d) kandidati koji su u inostranstvu stekli diplomu, prilažu dokumentaciju kojom potvrđuju da je inostrana visokoškolska kvalifikacije priznata ili da je takav postupak u toku (original ili ovjerena fotokopija), e) kandidati kojima diploma i dodatak diplomi još nisu izdati, dostavljaju uvjerenje o završenom ciklusu studija i uvjerenje o prepisu ocjena (original ili ovjerena fotokopija), f) izvod iz matične knjige rođenih (original ili ovjerena kopija), g) uvjerenje o državljanstvu (original ili ovjerena kopija, ne starije od 6 mjeseci).

Pored istaknutog, navedeno je da kandidati uz prijavu i obavezu dokumentaciju mogu dostaviti i dodatnu dokumentaciju kao što su: spisak objavljenih naučnih radova, projekata iz oblasti za koju se izbor vrši, objavljene naučne radove, dokumentaciju o doprinosu procesu internacionalizacije i društvenom doprinosu, podatke o nagradama ili priznanjima vezanim za odgovarajuću naučnu oblast, ukoliko ih kandidat posjeduje.

Nakon što je analizirala podnesenu prijavu i cjelokupnu priloženu dokumentaciju, Komisija u skladu s članom 112 i 124 ZOVO KS, te članom 227 i 236 Statuta UNSA, podnosi sljedeći:

I Z V J E Š T A J

a) Prijava kandidata:

Na osnovu Potvrde o prijavama na konkurs za izbor jednog saradnika/ce u zvanje viši/a asistent/ica na naučnoj oblasti Porodično pravo, broj: 01-844/26 od 29. maja 2026. godine, Komisija konstatira da je na raspisani Konkurs blagovremeno pristigla jedna vlastoručno potpisana i potpuna prijava koju je podnio Dino Kovačević, mr. iur., asistent na predmetima naučne oblasti Porodično pravo na Univerzitetu u Sarajevu – Pravnom fakultetu.

Prijava na Konkurs je zavedena pod brojem 01-740/26 od 14. maja 2026. godine. Kandidat je, uz prijavu koja je dostavljena i u elektronskoj formi (usb prilog broj 1), dostavio sljedeću dokumentaciju:

- 1) Dino Kovačević – profesionalna biografija: akademski *Curriculum Vitae* (u štampanoj i elektronskoj formi, *USB prilog broj 2*);
- 2) Izvod iz matične knjige rođenih, broj 08/2-13-31319/26 od 11. maja 2026. godine (izvornik);
- 3) Uvjerenje o državljanstvu, broj 08/2-13-31320/26 od 11. maja 2026. godine (izvornik);
- 4) Diploma Univerziteta u Sarajevu – Pravni fakultet o stečenoj akademskoj tituli i stručnom zvanju Bakalaureat/Bachelor prava, broj 2568 od 19. decembra 2020. godine (ovjerena kopija);
- 5) Dodatak diplomi Univerziteta u Sarajevu – Pravni fakultet od 19. decembra 2020. godine (ovjerena kopija);
- 6) Priznanje Zlatna značka Univerziteta u Sarajevu, broj 9/20 od 19. decembra 2020. godine (ovjerena kopija);
- 7) Diploma Univerziteta u Sarajevu – Pravni fakultet o stečenoj akademskoj tituli i stručnom zvanju Magistar prava, broj 1130 od 13. decembra 2022. godine (ovjerena kopija);
- 8) Dodatak diplomi Univerziteta u Sarajevu – Pravni fakultet od 13. decembra 2022. godine (ovjerena kopija);
- 9) Uvjerenje o položenom pravosudnom ispitu pred Komisijom za polaganje pravosudnog ispita Ministarstva pravde Bosne i Hercegovine, broj: 18.1-34-10-76/24 od 30. aprila 2024. godine (ovjerena kopija);
- 10) Certifikat o pohađanju Programa cjeloživotnog učenja u oblasti pedagoškog obrazovanja i jačanja kompetencija akademskog osoblja Univerziteta u Sarajevu, *Training & Research for Academic Newcomers* (TRAIN), broj: 0101-10379-4/24 od 16. oktobra 2024. godine (ovjerena kopija);
- 11) Ugovor o radu s akademskim osobljem, broj 01-1728/22 od 29. septembra 2022. godine (ovjerena kopija);
- 12) Potvrda Univerziteta u Sarajevu – Pravnog fakulteta o radnom odnosu, broj 01-732/26 od 13. maja 2026. godine (izvornik);
- 13) Potvrda o demonstratorskom angažmanu na predmetima naučne oblasti Porodično pravo (2018-2020), broj 01-1376/22 od 19. jula 2022. godine (ovjerena kopija);
- 14) Uvjerenje Kantonalnog suda u Sarajevu o pripravničkom iskustvu, broj 009-0-Su-20-000705 od 29. septembra 2022. godine (ovjerena kopija);
- 15) Odluka o imenovanju Redakcije Godišnjaka Pravnog fakulteta u Sarajevu, broj 01-24/26 od 9. januara 2026. godine (ovjerena kopija);
- 16) Potvrda Univerziteta u Sarajevu – Pravnog fakulteta o pohađanju III ciklusa studija – Doktorski studij na UNSA – Pravnom fakultetu, Katedra građanskog prava – Građanskopravni smjer od 11. maja 2026. godine (izvornik);
- 17) Uvjerenje o položenim ispitima na III ciklusu studija na UNSA – Pravnom fakultetu od 11. maja 2026. godine (izvornik);

- 18) Odluka Vijeća doktorskog studija UNSA-Pravnog fakulteta o verificiranju teme doktorske disertacije, broj 01-21-1/26 od 15. januara 2026. godine (ovjerena kopija);
- 19) Potvrda Odbora za osiguranje kvaliteta UNSA-Pravnog fakulteta o evaluaciji akademskog osoblja, broj 01-534-1/26 od 2. aprila 2026. godine (izvornik);
- 20) Upitnik za evaluaciju rada akademskog osoblja za zimski semestar akademske 2025/2026. godine (ispis iz e-UNSA sistema);
- 21) Upitnik za evaluaciju rada akademskog osoblja za ljetni semestar akademske 2024/2025. godine (ispis iz e-UNSA sistema);
- 22) Upitnik za evaluaciju rada akademskog osoblja za zimski semestar akademske 2024/2025. godine (ispis iz e-UNSA sistema);
- 23) Upitnik za evaluaciju rada akademskog osoblja za ljetni semestar akademske 2023/2024. godine (ispis iz e-UNSA sistema);
- 24) Potvrda o programu stručnog usavršavanja na temu: Primjena Zakona o zaštiti ličnih podataka BiH za zaposlenike Univerziteta u Sarajevu, broj 04-30-7-323/26-49350 od 23. februara 2026. godine (ispis elektronske potvrde);
- 25) Certifikat za učešće u svojstvu referenta na XI međunarodnom naučnom skupu Dani porodičnog prava, održanom 21. i 22. septembra 2023. godine u Mostaru (ovjerena kopija);
- 26) Certifikat za učešće u svojstvu referenta na XII međunarodnom naučnom skupu Dani porodičnog prava, održanom 03. i 04. oktobra 2024. godine u Mostaru (ovjerena kopija);
- 27) Certifikat za učešće u svojstvu referenta na III međunarodnoj naučnoj konferenciji „Društvena kriza i socijalni rad“ – *Poštivanje različitosti kroz zajedničko društveno djelovanje*, održanoj 21. marta 2023. godine u Sarajevu (ovjerena kopija);
- 28) Certifikat za učešće u svojstvu referenta na VI međunarodnoj naučnoj konferenciji „Društvena kriza i socijalni rad“ – *Buen Vivir: Zajednička budućnost za transformativnu promjenu*, održanoj 19. marta 2024. godine u Sarajevu (ovjerena kopija);
- 29) Certifikat za učešće u svojstvu referenta na IV međunarodnoj naučnoj konferenciji „Društvena kriza i socijalni rad“ – *Zajednička izgradnja nade i harmonije: Harambee poziv na ujedinjenje podijeljenog društva*, održanoj 17. marta 2026. godine u Sarajevu (ovjerena kopija);
- 30) Certifikat o poznavanju engleskog jezika od 11. aprila 2017. godine (ovjerena kopija);
- 31) Objavljeni radovi (pregled istraživačkog i stručnog angažmana), i to 1 (jedna) knjiga (dostavljena u elektronskoj formi, USB prilog broj 3 i 4), 9 (devet) naučnih radova i 4 (četiri) prikaza (dostavljene kopije):

a) Knjiga:

- 1) Sudžuka, E., Duman Vranić, Dž., Hadžijusufović, H., Kovačević, D. (2026). *Prava djeteta u sistemu javnih politika i budžetskog planiranja u Bosni i Hercegovini*. Sarajevo: Univerzitet u Sarajevu-Pravni fakultet.

b) Naučni radovi:

- 1) Banović, D., Kovačević, D. (2022). Sexual Orientation and Gender Identity in the Countries of the Former Yugoslavia, *Jahrbuch für Ostrecht*, vol. 63, 251–280.
- 2) Duman Vranić, Dž., Kovačević, D. (2023). Preporuke matičara budućim bračnim partnerima – ukrasni karakter ili stvarna funkcija. *Zbornik radova – XI međunarodni naučni skup Dani porodičnog prava, Mostar*, 239–249, pregledni naučni rad.
- 3) Vranić, Dž., Kovačević, D. (2023). Pravo djeteta na zdravlje: nužnost zajedničkog djelovanja. *Sarajevski žurnal za društvena pitanja, godište XII, broj 2-2, Sarajevo, Univerzitet u Sarajevu – Fakultet političkih nauka*, 59–72, pregledni naučni rad.
- 4) Kovačević, D. (2024). Obrazovanje djeteta i roditeljska autonomija – neriješena pitanja. *Zbornik radova „Pravne praznine i punoća prava“*, Istočno Sarajevo, 271–283, pregledni naučni rad.
- 5) Duman Vranić, Dž., Kovačević, D. (2024). Pravo djeteta na život s roditeljima – teorijska analiza „otuđenja djeteta od roditelja“ kroz odabranu bosanskohercegovačku sudsku praksu. *Zbornik radova – XII međunarodni naučni skup Dani porodičnog prava, Mostar*, 227–240, pregledni naučni rad.
- 6) Kovačević, D., Morankić, E. (2024). Između tužbe i sporazuma za razvod braka: procesna nedoumica ili izigravanje zakona. *Zbornik radova – Međunarodni naučni skup „Izazovi i perspektive razvoja pravnih sistema u XXI vijeku“*, Banja Luka: Univerzitet u Banjoj Luci – Pravni fakultet, godina IV, broj 4, Tom II, 127–136, naučna kritika.
- 7) Vranić, Dž., Kovačević, D. (2025). Pravo djeteta i adolescenata na mentalno zdravlje: obaveze donositelja odluka u bosanskohercegovačkim transformacijskim procesima. *Zbornik radova – Društvena kriza i socijalni rad – Buen Vivir: zajednička budućnost za transformativnu promjenu*, Sarajevo: Fakultet političkih nauka, 100 – 119, Godište 1, broj 1, izvorni naučni rad.
- 8) Izmirlija, M., Kovačević, D. (2025). Uloga sudova u priznavanju prava na brak istospolnih parova – put za Bosnu i Hercegovinu? *Pravna misao*, Sarajevo, broj 7 – 8, 26 – 46, pregledni naučni rad.
- 9) Duman Vranić, Dž., Kovačević, D. (2025). Alternativni načini rješavanja porodičnih sporova: smanjenje troškova i očuvanje najboljeg interesa djeteta. *Pregled: časopis za društvena pitanja*, Sarajevo, 66(3), 67 – 83, pregledni naučni rad.

c) Prikazi:

- 1) Kovačević, D. (2023). Seminar “Kandidatski status i europeizacija prava u Bosni i Hercegovini”, *Pravna misao*, Sarajevo, broj 7–8, 170–175, prikaz.
- 2) Kovačević, D. (2025). Međunarodna konferencija „Rizična ponašanja u online okruženju u cilju prevencije nasilja na internetu“, Univerzitet u Sarajevu-Pravni fakultet, 12. decembra 2024. godine, *Pravna misao*, Sarajevo, broj 1–2, 105–108, prikaz.
- 3) Kovačević, D. (2025). Nelijep ženski život u postosmanskoj Bosni: zabluda ili svjedočanstvo o nepromijenjenom? Žene u sudskim spisima 1878 – 1914. Odbjegle, preljubnice, rentijerke, zemljovlasnice“, Institut za historiju Univerziteta u Sarajevu, Sarajevo, 2023, str. 337). Sarajevo: *Godišnjak Pravnog fakulteta u Sarajevu*, LXVIII, 313–317, prikaz.

- 4) Kovačević. D. (2025). Uvod u roditeljsku odgovornost, drugo i dopunjeno izdanje, prof. dr. Džamna Duman Vranić, Univerzitet u Sarajevu-Pravni fakultet, Sarajevo, 2025. godina. *Pravna misao*, Sarajevo, broj 11 – 12, 67 – 71, prikaz.

b) Osnovni biografski podaci:

Dino Kovačević rođen je 14. oktobra 1997. godine u Tuzli, gdje je završio osnovnu školu i Gimnaziju „Meša Selimović“. Državljanin je Bosne i Hercegovine. Diplomirao je na Univerzitetu u Sarajevu – Pravnom fakultetu 2020. godine, s prosječnom ocjenom 9,84 te je stekao priznanje Zlatna značka Univerziteta u Sarajevu. Sticanje potrebne prakse za polaganje pravosudnog ispita ostvario je kao pripravnik na Kantonalnom sudu u Sarajevu. Odbranom završnog rada na temu „Država kao *parens patriae*: javni interes i roditeljska odgovornost“, 2021. godine na matičnom fakultetu stekao je akademsku titulu i stručno zvanje – magistar prava, čime je uspješno okončao drugi ciklus studija na kojem je ostvario prosječnu ocjenu 10,00. Za asistenta na naučnoj oblasti Porodično pravo na Univerzitetu u Sarajevu – Pravnom fakultetu izabran je 28. septembra 2022. godine. U aprilu 2024. godine položio je pravosudni ispit pred Komisijom Ministarstva pravde Bosne i Hercegovine. Od akademske 2024/25. godine student je Doktorskog studija Univerziteta u Sarajevu – Pravnog fakulteta, gdje je u dosadašnjem toku studija ostvario prosječnu ocjenu 10,00. Odlukom Vijeća dokorskog studija UNSA-Pravnog fakulteta, broj 01-21-1/26 od 15. januara 2026. godine, kandidatu je verificirana tema doktorske disertacije pod naslovom: „Prava djeteta i umjetna inteligencija“.

c) Ocjena ispunjenosti uvjeta za izbor u zvanje viši/a asistent/ica:

Prilikom ocjene ispunjenosti uvjeta za izbor u zvanje viši/a asistent/ica, Komisija je, u skladu s članom 112 stav 1 i stav 2 tačka b) ZOVO KS, na osnovu priloženih dokumenata, vrednovala:

a) *minimalne uvjete* za izbor akademska zvanja, a vezane za izbor u zvanje višeg asistenta: završen drugi ciklus studija ili njegov ekvivalent s najmanje 300 ECTS, 8 ili 3,5 ili VII stepen studija po predbolonjskom sistemu studija s najnižom prosječnom ocjenom 8;

b) *dodatne uvjete* od naročitog značaja za naučnu oblast izbora (prosječna ocjena iz predmeta naučne oblasti, usavršavanje u naučnoj oblasti u kojoj se vrši izbor, tema završnog rada, demonstratura, sudjelovanje na relevantnim skupovima, edukacije i slično), a koji se, u kontekstu uvjeta za izbor u naučno-nastavna zvanja na visokoškolskim ustanovama definiiraju kroz 4 (četiri) oblasti i to: naučna dostignuća i doprinos, nastavničke sposobnosti i doprinos, doprinos procesu internacionalizacije, te društveni doprinos.

1) Minimalni zakonom propisani uvjeti:

Uvidom u Diplomu Univerziteta u Sarajevu – Pravni fakultet o stečenoj akademskoj tituli i stručnom zvanju Bakalaureat/Bachelor prava, broj 2568 od 19. decembra 2020. godine (ovjerena kopija), Dodatak diplomi Univerziteta u Sarajevu – Pravni fakultet od 19. decembra 2020. godine (ovjerena kopija), Priznanje Zlatna značka Univerziteta u Sarajevu, broj 9/20 od 19. decembra 2020. godine (ovjerena kopija), te Diplomom Univerziteta u Sarajevu – Pravni fakultet o stečenoj akademskoj tituli i stručnom zvanju Magistar prava, broj 1130 od 13. decembra 2022. godine (ovjerena kopija) i Dodatak diplomi Univerziteta u Sarajevu – Pravni fakultet od 13. decembra 2022. godine (ovjerena kopija), **Komisija jednoglasno konstatuje da je kandidat na I ciklusu studija ostvario prosječnu ocjenu 9,84 a na II ciklusu studija**

10,00, te da time ispunjava uvjete koji se odnose na završen drugi ciklus studija (odgovarajući stepen obrazovanja) i propisanu najnižu prosječnu ocjenu.

Premda navedene okolnosti nadilaze minimalne zakonom propisane uvjete koji se odnose na odgovarajući stepen obrazovanja i najnižu prosječnu ocjenu, Komisija cijeni značajnim istaći da je kandidat tokom prvog ciklusa studija iz predmeta naučne oblasti u kojoj se bira (Porodično pravo I i Porodično pravo II) ostvario prosječnu ocjenu 10,00. Također, na Doktorskom studiju Univerziteta u Sarajevu – Pravnog fakulteta, na izbornom predmetu Prava djeteta, ostvario je ocjenu 10,00. Navedeni rezultati dodatno potvrđuju uspješnost kandidata u oblastima koje su neposredno povezane s naučnom oblasti Porodično pravo.

2) Dodati uvjeti:

Članom 112 stav 3 ZOVO KS predviđeno je da će Statutom i općim aktom, a u skladu sa Smjernicama iz člana 116, visokoškolska ustanova utvrditi posebno vrednovanje za dodatne oblasti prilikom izbora u akademska zvanja, ali Smjernice ni navedeni opći akti Univerziteta nisu doneseni.

Ipak, član 112 stav 1 i stav 3 ZOVO KS daje određene upute i okvir iz kojih je moguće procijeniti šta zakonodavac smatra relevantnim kod izbora u akademska zvanja: naučna dostignuća i doprinos, nastavničke sposobnosti i doprinos, doprinos procesu internacionalizacije, te društveni doprinos, pri čemu daje preciznije odrednice za pojedine kriterije. Komisija je cijnila tako propisane kriterije. Međutim, s obzirom na to da se radi o prvom napredovanju, od kandidata nije moguće zahtijevati ispunjenje navedenih kriterija u potpunosti, ali Komisija je nastojala utvrditi postoji li barem određena tendencija kada su pojedini kriteriji u pitanju.

2.1. Naučna dostignuća i doprinos

Iako objavljeni naučni radovi ne predstavljaju formalni uvjet za izbor u zvanje višeg asistenta, Komisija je cijnila činjenicu da je kandidat uz prijavu dostavio značajan broj naučnih radova. Posebno se ističe koautorstvo na naučnoj monografiji *Prava djeteta u sistemu javnih politika i budžetskog planiranja u Bosni i Hercegovini* (2026), kao i kontinuirana naučnoistraživačka aktivnost kroz objavljivanje radova u relevantnim naučnim časopisima i zbornicima radova.

Komisija konstatuje da se svi objavljeni radovi kandidata odnose na tematske sadržaje koji pripadaju naučnoj oblasti Porodično pravo, s posebnim osvrtom na pitanja roditeljske odgovornosti i prava djeteta. Time kandidat pokazuje jasno profilisanu naučnoistraživačku orijentaciju u okviru naučne oblasti za koju se bira.

Komisija posebno cijeni činjenicu da je kandidat, pored koautorskih radova, autor i samostalnih naučnih priloga, kao i da su pojedini radovi objavljeni u priznatim domaćim i međunarodnim publikacijama. Objavljeni prikazi knjiga, naučnih skupova i stručnih događaja dodatno potvrđuju aktivno praćenje savremenih naučnih i stručnih kretanja u oblasti porodičnog prava. Navedene publikacije, iako nisu formalni uvjet za izbor u predmetno zvanje, predstavljaju vrijedan pokazatelj naučnoistraživačkog potencijala kandidata i njegove posvećenosti akademskom razvoju u naučnoj oblasti Porodično pravo.

Također, kandidat kontinuirano ulaže napore u stručno i akademsko usavršavanje. Posebno se ističu položeni pravosudni ispit pred Komisijom Ministarstva pravde Bosne i Hercegovine 2024. godine, uspješno završen TRAIN program Univerziteta u Sarajevu usmjeren na razvoj nastavnih i pedagoških kompetencija akademskog osoblja te učešće u specijaliziranim edukacijama iz oblasti istraživanja dječjih prava i etike istraživanja. Navedene aktivnosti, prema ocjeni Komisije, doprinijele su jačanju stručnih, nastavnih i istraživačkih kompetencija kandidata.

Naposlijetku, Komisija cijeni da odabir teme završnog rada drugog ciklusa studija ("Država kao *parens patriae*: javni interes i roditeljska odgovornost"), kao i verificirana tema doktorske disertacije („Prava djeteta i umjetna inteligencija”), ukazuju na kontinuiran naučni interes i dosljednu istraživačku usmjerenost kandidata prema pitanjima koja pripadaju naučnoj oblasti Porodično pravo, u kojoj se kandidat bira u više akademsko zvanje.

2.2. Nastavničke sposobnosti i doprinos

Prilikom ocjene nastavničkih sposobnosti i doprinosa kandidata, Komisija je imala u vidu činjenicu da se radi o prvom izboru u više akademsko zvanje. Ipak, Komisija smatra da dosadašnji angažman kandidata pruža dovoljno osnova za ocjenu njegovih nastavničkih kompetencija i opredijeljenosti za rad u visokom obrazovanju.

Naime, iz Potvrde o demonstratorskom angažmanu na predmetima naučne oblasti Porodično pravo (2018-2020), broj 01-1376/22 od 19. jula 2022. godine (ovjerena kopija), kao i Potvrde Univerziteta u Sarajevu – Pravnog fakulteta o radnom odnosu, broj 01-732/26 od 13. maja 2026. godine (izvornik) proizlazi da je kandidat, još tokom studija, bio angažiran u svojstvu demonstratora, nakon čega je izabran u zvanje asistenta na naučnoj oblasti Porodično pravo. Kontinuitet njegovog angažmana u nastavnom procesu, od demonstratorskog rada do obavljanja dužnosti asistenta, ukazuje na izražen afinitet za rad sa studentima, kao i opredijeljenosti za rad u visokom obrazovanju.

Također, uvidom u Potvrdu Odbora za osiguranje kvaliteta UNSA-Pravnog fakulteta o evaluaciji akademskog osoblja, broj 01-534-1/26 od 2. aprila 2026. godine (izvornik), te dostavljene izvode iz upitnik za evaluaciju rada akademskog osoblja proizlazi da studenti rad kandidata ocjenjuju izrazito pozitivno, posebno ističući njegovu stručnost, profesionalnost, pristupačnost, kvalitetnu pripremljenost za nastavu i sposobnost da kroz interaktivan pristup doprinese boljem razumijevanju gradiva. Komisija smatra da ovakve ocjene potvrđuju kvalitetan i predan nastavni angažman kandidata.

2.3. Doprinos procesu internacionalizacije

Premda se u članu 112 stav 3 tačka b) ZOVO KS navodi šta doprinos procesu internacionalizacije obuhvata, Komisija ističe da, s obzirom na to da je posrijedi prvo akademsko napredovanje, čitav niz navedenih zahtjeva nije moguće u cijelosti ispuniti. No, ipak, određene aktivnosti kandidata upućuju na to da su neki kriteriji ispunjeni iako se radi o osobi koja je na početku akademske karijere.

U tom smislu, Komisija je cijenila aktivno učešće kandidata na domaćim i međunarodnim naučnim skupovima, konferencijama, seminarima i stručnim raspravama, na kojima je u

svojstvu referenta, izlagača ili izvjestitelja prezentirao rezultate vlastitih i koautorskih istraživanja iz oblasti porodičnog prava, prava djeteta i ljudskih prava. U tom smislu, posebno se ističe kontinuirano učešće kandidata na međunarodnim naučnim skupovima *Dani porodičnog prava*, konferencijama *Društvena kriza i socijalni rad* te drugim naučnim i stručnim skupovima u zemlji, što potvrđuje njegovu aktivnu uključenost u naučnu i stručnu zajednicu te doprinos promociji rezultata naučnoistraživačkog rada.

2.4. Društveni doprinos

Članom 112 stav 3 tačka c) ZOVO KS propisano je da društveni doprinos, između ostalog, obuhvata: učešće u nadležnim tijelima/komisijama/grupama/savjetima koje rade na jačanju, planiranju i unapređenju svih procesa u okviru visokoškolskih ustanova; rad na realizaciji aktivnosti vezanih za unapređenje institucije i razvoj zajednice; učešće u izdavačkom/uređivačkom odboru domaćih časopisa, zbornika radova i monografija; organizacionom i naučnom odboru domaćih konferencija, savjetovanja, okruglih stolova; rad na oblikovanju javnih politika; volonterski rad za visokoškolsku ustanovu i zajednicu; rad na razvojnim projektima.

Prema podacima navedenim u biografiji i dokumentaciji koju je kandidat dostavio uz prijavu na konkurs, pored nastavnih, naučnoistraživačkih i stručnih aktivnosti, kandidat je pokazao značajan stepen angažmana u radu Fakulteta kroz obavljanje različitih akademskih i administrativnih dužnosti. Posebno se ističu funkcije sekretara Katedre građanskog prava, koordinatora drugog ciklusa studija, člana više stalnih i *ad hoc* komisija Fakulteta, člana odbora za organizaciju naučnih i stručnih skupova, člana radnih tijela za izradu internih akata te sekretara Redakcije Godišnjaka Pravnog fakulteta u Sarajevu. Navedene aktivnosti, prema ocjeni Komisije, potvrđuju spremnost kandidata da aktivno učestvuje u razvoju akademske zajednice i institucionalnim procesima Fakulteta.

Kandidat Dino Kovačević je kroz svoje naučne radove i publikacije, ali i druge mjerljive rezultate pokazao visok stepen stručnosti i inovativnosti jasno dokazavši potencijal da može doprinijeti budućem razvoju nauke porodičnog prava u Bosni i Hercegovini kako na teorijskoj, tako i na praktičnoj ravni.


Zaključna ocjena i prijedlog Komisija

Na osnovu prethodno obrazloženog, Komisija Vijeću Univerziteta u Sarajevu – Pravnog fakulteta dostavlja


PRIJEDLOG

da se kandidat DINO KOVAČEVIĆ, mr. iur., izabere u akademsko zvanje viši asistent na naučnoj oblasti Porodično pravo na Univerzitetu u Sarajevu – Pravnom fakultetu.

KOMISIJA:



Prof. dr. Džamna Vranić



Dr. Suzana Bubić, profesorica emerita



Prof. dr. Darko Radić